

Fragmenter af et politisk ledelse

All: Markus E. Olsen "Alloriaqqiffik"-mi peqataasoq

Juaaka Lyberth AG nr. 7.-mi piffissami kingullermi "Alloriaqqiffik"-miit avammut saqqummiuttakkatsinnut nalilersuuteqarluni qisuariaateqarpoq "Enoksen hænger ikke på tynd tråd"-mik qulequtserlugu.

Juaakap Enoksenip siulittaasuuneranik apeqquserneqarsinnaanngitsumik naqissuseraluaraa taamaattoq uagut oqallinneq, isummersorneq, pingaarnersiueriaaseq suleriaaserlu allaanerusoq ujartorlugu saqqummerpugut Siumukkormioqatitta siulittaasumut maniguunnermiit nutaamik isumataarsinnaanerannut aqqtissiuusseqataajumalluta, isumaqaratta ittoqut/siuttoq unammillernartunik illuatungilersorneqalertariaqartoq partiip nunattalu peqqinnarnerusumik siulersorneqalernissaa anguniarlugu.

Juaakap saqqummiussaani arlaqartut inissitassaapput:

- Inatsisartut Siumullu gruppiata suleriaasia ilisimagaanni partiip akunnerminni gruppip iluani kikkut kinalu Siulittaasoqarfimmiissaasoq aalajangigassaraat, tassanilu Partiip siulittaasua (HE) Naalakkersuisut siulittaasuatut pinnani partiimi siuttutut inissiisinnaavoq; Siulittaasoqarfiummi sullarliorneratigut Partii eqqorneqarpoq, massa partiit allat pineqaraluartut.
- Enoksenip (HE) nalaani inuit partiimit assigiinngitsuneersut partii oqquiffittut ataatsimoorfittullu atorpaat, tamannalu HE-p piginnaaneqarfigigaa isumaqatigiissutigineqarsinnaavoq, apeqqutinngorporli Partii pillugu Siumukkormiunngornersut imaluuniit HE pillugu Siumukkormiunngornersut? Tamannaavoq oqallinnermi ujartugarput; partiip tunngaviusumik anguniagai pineqarpat imaluunniit inuit ataasiakkaat anguniagaat?
- Aap, misigissutsit sumiluunniit aallaviusarput inuk qanoq anguniagaqartoq ilisarissagaanni paasissagaannilu, taamaattoq nunatsinni nunarsuarmioqatittalu akornanni nalaattarparput silassorissusertik qaangerlugu misigissutsitik kisiisa aallavigalugit maniguuttartut pissutsit piviusut qanoq kinguneqarumaarnerat naatsorsuutiginaq. Inuttarsiuineq imaluuniit arsaq? Arsaq maanngaannaq akeqqat tungaannut isimmikaqqunagu inuttaliisoqartarpoq, soorlu aamma partiip iluani qinersiniaraanni inuttaliisariaqartartoq.
- HE nalaani anguneqarsimasutut taakkartukkat ilarpassui tassaannginnerpat ineriartornerup immiini nassataanik atorfilittat qangaaniilli siuttumut kiugaluartumulluunniit suliaat HE-p immikkut nammeneq qanoq iliuuseqarfiginagit atsiuginnagai?

Taamaattoq Juaakap assiliaq ilivitsaq ujartugaa tusagassiutit aqqtigalugit ilivitsunngorsinnaaganngilaq; partiimmi iluani ajornartorsiutit partiip iluani taamaallaat aaqqinneqarsinnapput, tamannalu anigorniarlugu immikkoortoqarfimmi kingullermik ataatsimiinnermi sukumiisunik saqqummereernerma kingorna iliuusissatut siunnersuutigisat ingerlateqqinnissaannut taparserneqarput.

Naalakkersuinikkut anguniagassat eqqarsaatigalugit Alloriaqqiffimmiit

isumaqatigiissutigisinnaasatta saniatigut makku taaneqarsinnaapput:

Siumup aaqqissugaaneranut tunngasut:

1. Siumup naalakkersuinikkut oqariartuutigisartagaani pingaarnersiueriaaseq allannortissallugu siulittaasup tullersortini qimutsittariaqarpai (qimutsissinnaagunigit) inuttut inuunermi ulluinnarni atukkat issittumi inuuniarnermut naapertuunnerusumik periarfissaqaqqullugit. Assersuutitut qanga kingullermik immikkoortoqarfiit ilaasortallu Ulluinnarni Aqutsisut Siulersuisuunerillu ataatsimiissutaanik takusaqarpat? Qanga kingullermik siuttoq naalakkersuinikkut anguniagassanik isumaliutersuuteqarpa (naak arsaq/politikkia)? Maannamut partiip siuttua aatsaat qanoq iliuuseqalertarpoq tusagassiutit “ajortunik” saqqummiigaangata – meeqqanngooq perlilerput, aamma upernaq “paasisat nutaat” atuaqatigiit arlariiat anisussat pipallatamik efterskoleliuuppaat (ilinniartitsisut atuartullu qassit pilliutigalugit?) il.il.; utaqqiisaasunik aqqeeqattaarnerit qassit nalaappagut? Imaappa aamma Itilleq tusagassiutitigoortumik “ulussaarsuup” aqqusaarpagu aatsaat qanoq iliuuseqarnialissasoq?

Isumaginnermut peqqissutsimut Ilagiinnullu tunngasut

2.

a) Isumaginninnikkut, peqqinnissakkut anersakkullu sullissinerup katsorsaariaatsillu nutartertuurtup ataqatigiissarnerisivot - peqqissaavit isumaginnittoqarfiit Ilagiillu kalaallit suleqatigalugit aqqissuussisoqassaaq.

b) Inunnik sullissiviit pisortanit ingerlanneqartut aammalu namminersortut ingerlataat ataqatigiissumik sullitatik qitiutillugit ikorfartoqatigiittariaqarput.

c) Ilaqutariit ulluinnarni inuunerata atoruminartuunissaanut ilaqutariinnut tulluurtumik naleqquttumillu sinaakkusersuisoqartariaqarpoq. Nunarput ilaqutariissuaqarfiuvoq, nunarpullu ilaqutariittut pilersuiffigissallugu inuuniarfigissallugulu naapertuuttunngortittariaqarparput, pingaartumik ilaqutariinnut meerartakkaanut.

Atuartitaaneq ilinniartitaaneq inuutissarsiornerlu

3. Inuiaqatigiinni atorfissaqassuseq atorfissaqaqatigiinnerlu siuarsassallugu nunatta qitornai perorsaanerme inuiaqatigiinnut kiffartortortut, pilersitseqataasutut ineriartortitseqataasutullu misigisimatinnissaannut – suliffeqarfiit inuleriviillu pitsaassuseqartumik inerisarneqarnissaannut ataqatigiissumik suleqatigiisinneqartariaqarput.

4. Atuartitaanermi ilinniartitaanermilu ilinniartup inuiaqatigiinni atorfissaqassusia qaffarsarneqassappat inuiaqatigiinniit ilinniakkat suut pisariaqartinnerlugit erseqqissaasariaqarpugut, pingaarnersiuinikkullu ilinniartitaaneq inerisarneqassaaq, inuiaqatigiit peqqissut tamatigoortullu nunami namminersortumi pilersinneqassappata.

Oqaatsit:

5. Oqaatsinut politikkip piviusunngortinnissaanut Oqaasileriffik, Piareersarfiit Oqaatsinullu pikkorissarfik tamakkiisumik ataqatigiissaakkamillu sulisinneqassapput .

Pumasaqaatit 9. naammassinneqarsinnasut?

Siorna Siumup ataatsimeersuarnissaanut siulittaasumut pumasaqaatit qulingiluat Juaakap Enoksenimut angujuminaatsuliatut qaqtai malillugit nalilersuissaguni siulittaasup sulinera qanormita isummerfigissagaluarpa?

Taamaattoq Juaakap pumasaqaatit saqqummiussai qanoq naammassineqarsinnaanersut isummerfigisimavakka, aammalu Siumup tunngaviusumik aaqqissuussaannermigut immikkoortunut pingasunut agguakkanik katillugit 32.-nik immikkoortulinnik anguniagassanik tunngavilersuutitalik siorna Siumup ataatsimeersuarnissaanut saqqummiussaqpunga qaqinneqarsimanngitsunik!

Nutartertuarneq partiip pisariaqartippaa Siumut inuiaqatigiillu tunngaviusumik alloriaqqissappata; piffissanngorporlu naalakkersuinikkut tamakkiisumik isiginnittaaseqarluni - nalaatsorneriinnaanngitsumillu nunamut misigissuseq isumatussuserlu ataatsimoortillugit siunnerfiliornissaq. ***Siumukkormioq tassaavoq avinngarusimasumi issittumi, pinngortitamilu imminut aaqqissortumi najugalik taamaattorli nunarsuarmi allanngorartuartumi naleqqussarluni inooqataasoq.***